

知北遊

古體

七言

木柵種茶詩

南方嘉木天下奇，取栽安溪勝武夷；烏龍豈惟誇鹿谷，木柵茶韻更神馳。
芳叢居屬神仙地，翠峰紫霧最相宜；闢荒不懼山瘴確，揮汗未惜手胼胝。
玉葉靈根和露種，春雷初發茁瓊枝；艱難無異蒔國色，國色清華猶遜之。
疇日初啟何濫褻，耕雲樟湖起瑰姿；但對茗香心更記，前賢今人辛苦時。

註：木柵鐵觀音源自於福建安溪，最早在新店種植，後遷至木柵樟湖山。

春夜天元宮賞櫻

北城昨夜起春風，韶華旖旎天元宮；天孫纖手弄機杼，錦織千樹綺霞紅。
豈無騷客迷佳景，應有彩蝶舞芳叢；多少良辰如此夜，銷盡浮生如夢中。
天際玉輝晴無極，花下流芳趣不窮；可憐幽賞唯獨影，春光誰共訴情衷。
欲挽東風情未謝，莫捲菲菲逝太匆。

律體

七言律詩

北門承恩門

浩蕩日軍經此門，空言鎖鑰更銷魂；南柯驚破非無憾，北極虛承豈有恩。
夢裡江山今日客，眼前城郭舊時痕；當年開戶誅屠免，功過千秋未忍論。

註：面向北方，取意「承接天恩」，著重防禦，是臺北目前唯一保留舊貌的城門，有「巖疆鎖鑰」石額，當年日軍即從此門入臺北城。

擎天崗草原

獨坐郊原意上流，層崗氣聳北城秋；風冷已覺芳春夢，衣薄猶沾寒草愁。
蝸角爭高難罷手，天涯望盡肯回頭；雲心一片平川曠，莫縛利名如楚囚。

金包里芒花

吟絮妙才猶是空，爭如芒雪遍山中；鬢生寒露千重白，笑映斜陽萬頃紅。
一世行藏依翠嶺，三秋事業付金風；鬢霜嘲與君相友，蕭瑟寸心斑駁同。

貓空親山步道賞月

攀嶺雅為天上民，秋從晚色更遊巡；清風萬竅心三昧，明月千峰我一人。
光霽襟懷方有品，胸開雲翳始無塵；登高忽眺京華影，歸去此番休隱淪。

士林官邸賞菊有懷

未及憐春日又斜，復看霜色滿京華；人生歲老情如酒，官邸秋深菊若霞。
玉雪無端豐白髮，金風有意瘦黃花；幾番年下尊鱸思，伴我夢中回到家。

聞北投石被盜

無煩媧女煉成材，水孕奇岩生北臺；光燦琉璃齊日月，價逾金玉勝瓊瑰。
盜來泉石千秋歲，鬻作埃塵萬貫財；自古盛名多負累，一朝如竭使人哀。
**註：北投石礦石結晶含放射性鐳，130年才能生成1公分結晶，價格不菲。
北投溪全流域目前已禁採。**

登象山觀景臺觀景

獨立憑欄最上流，心高意遠共雲浮；牙啣光潤青篁影，鼻舉軒昂碧昊秋。
何似盲人時欲撫，怎堪全貌總難求；京華俯瞰猶如此，一度登臨一度愁。

訪玫瑰古蹟懷蔡瑞月老師

暮年高志詎徬徨，巢覆流離未自傷；世事豈堪重卻顧，丰姿終可再輕颺。
春回舞館人相問，秋老情懷已獨藏；留得蹢躅青史上，遍栽桃李永芬芳。

漁人碼頭搭渡輪

如遊銀漢渡青霄，極目滄藍一路遙；海闊乘舟身不繫，風清散髮意猶飄。
豈因能慣沉浮事，但為無憂起落潮；生世本多波浪裡，心瀾得靜自逍遙。

秋夜騎單車過陽光橋

森涼夜氣蕩波微，橋綻虹霓映彩輝；足踏輪隨明月轉，神馳車御晚風歸。
高情詎忍時將至，逸興堪酬身欲飛；非戀秋寒滋味好，但求無與寸心違。

馬偕博士上岸處銅像

憑弔先賢河岸尋，跡留人逝感沉吟；懸壺遺愛青山永，設教懷恩淡水深。
羈旅豈無鄉國夢，平生何有利名心；堪傷時事多痾病，誰復針膏更淑今。

過臺北植物園荷花池問殘荷

搖落榮華秋一池，不禁秋緒亂參差；遙懷芳跡猶今處，忍見光儀非昔時。
已愧葉殘難挹露，更悲風凜易枯枝；豈因君子憂群小，故爾藕多煩惱絲。

紅毛城

淡江終古碧迢迢，空繞城臺慰寂寥；岑嶺青將秋水染，夕陽紅帶暮雲飄。
寒潮有語聲千里，衰草無情夢六朝；倚遍欄杆唯悵望，西風樓上晚蕭蕭。
註：「紅毛城」歷經西班牙、荷蘭、明鄭、清朝、日治至民國以後，故稱六朝。

大稻埕老街

千載稻江千里流，昔年商舶夢悠悠；繁華潮去春安在，喧雜客來街尚留。
光景何如今日賞，風情怎及少年遊；閒看過往紅顏子，舊蹟尋歡不識愁。

淡水秋夕

雁聲初度水流東，秋日寒山屏碧空；萬丈霞光描北部，一江船影淡西風。
鬢供殘荻愁仍白，顏借餘暉笑亦紅；最是繁華如夢裡，幾家門映夕陽中。

虎山登頂

登高一嘯凜生風，白額眼橫千古空；氣猛欲吞秋色外，形潛似隱樹聲中。
當年已吼懸崖裂，此地猶窺峭壁雄；長願人間清且定，得無苛政與君同。

擎天崗水牛

看慣西風木葉黃，青蹄信步踏斜陽；已憐窮士悲謳角，復忍庸材亂鼓簧。
衰草飽嘗知世冷，空山獨臥感秋長；如教拯得城中餒，羸病何辭耕稼忙。

五言律詩

觀龍鳳谷郁永河採硫紀念碑

渡海赴荒陬，微軀逐浪浮；東來驚黑水，北上採黃硫。
藜杖窮奇絕，竹枝歌歷遊；當時湖澤處，今已帝王州。

註：清康熙三十六年清廷派郁永河渡海來臺採硫，期間曾寫竹枝詞十二首記載
來臺見聞，當時所見臺北盆地仍為湖泊，今已為首都。

絕句

七言絕句

九份礦工聚落

開山採礦逐繁華，入穴輕身足怨嗟；嘗遍艱辛憔悴後，可憐富貴在誰家。

新北二重疏洪道荷花公園賞荷

碧波爭放火霞丹，臨水香風清助歡；一朵嫣然搖動處，無殊西子捧心看。

九份老街

暮來煙雨滿城風，翻起客愁如轉蓬；金粉凋殘今不見，回眸街老晚燈紅。

春日自遣

雖慣京塵安作巢，猶懷春景度煙郊；笑看生計多窮拙，坐對繁華總自嘲。

深坑老街豆腐

深坑水碧豆如珠，研出神人冰雪膚；愛此淮王金鼎術，清腴只合薦仙廚。

剝皮寮歷史街區

剝皮傷感舊時榮，古厝殘輝夕日明；絕似徐娘餘態在，風流雖老亦多情。

泡烏來溫泉

冷訪烏來尋翠微，溫湯暖處起煙霏；池中盡洗塵機去，別有閒情似浴沂。

遊板橋林家花園

清賞偏銷騷客魂，春光寂寞駐芳園；粉牆忽見寒苔跡，猶帶當年殘夢痕。

逸仙公園詠高枝白梅

無意東風春色長，自將傲骨鬪冰霜；惟能冷綻高枝上，不肯低頭弄俗香。

碧潭日暮觀遊船

碧潭將暮客遊稀，獨坐湖光對落暉；一葉扁舟波蕩去，彩霞須載滿船歸。